

Kæru foreldrar/forsjáraðilar nemenda í 10. bekk.

Nú eru stór og spennandi tímamót fram undan í lífi barna ykkar því innritun í framhaldsskóla hefst í dag. Með þessu bréfi viljum við upplýsa foreldra/forsjáraðila nemenda í 10. bekk um framkvæmd innritunar nýnema í framhaldsskóla næsta haust en hún fer fram í gegnum Ísland.is. Til að sækja um þarft þú eða umsækjandi að vera með rafræn skilríki í símanum. Þar sem nemendur í 10. bekk eru ólögráða er samþykki þeirra aðila sem fara með forræði barns áskilið við innritun í framhaldsskóla.

Staðfesting á rafrænni umsókn berst nemendum sjálfum en við lítum svo á að með því að upplýsa um fyrirkomulag innritunar sé tryggt að foreldrar/forsjáraðilar fylgist með innritun barna sinna.

Umsókn og upplýsingar um nám

Sótt er um framhaldsskóla í gegnum Ísland.is, island.is/umsokn-um-framhaldsskola, þar eru allar helstu upplýsingar um umsóknarferlið. Við höfum hvatt nemendur eindregið til að skoða inntökuskilyrði þeirra skóla sem þau hafa áhuga á áður en sótt er um. Inntökuskilyrðin má sjá á heimasíðu viðkomandi skóla.

Á vefsíðunni Næsta skref (naestaskref.is) má finna ýmsar gagnlegar og áhugaverðar upplýsingar varðandi áframhaldandi nám. Við hvetjum nemendur til að kynna sér efni síðunnar vel áður en sótt er um nám í framhaldsskóla.

Umsóknarfrestur

Innritun í framhaldsskóla stendur yfir **frá 24. apríl til og með 10. júní 2026**. Nemendur sækja um tvo til þrjá skóla og velja sér jafnframt tvær námsbrautir innan hvers skóla (fyrsta val og annað til vara). Meðan innritun stendur yfir geta nemendur breytt umsókn sinni. Það getur verið hvort heldur vegna þess að nemandi hafi skipt um skoðun eða meti það svo að standast ekki inntökuskilyrði á þær námsbrautir sem sótt var um.

Þegar grunnskólum hefur verið slitið í vor flytjast skólaeinkunnir (lokavitnisburður) nemenda rafrænt til þeirra skóla sem þeir sóttu um hjá.

Fylgiskjöl með umsóknum

Það þarf **ekki** að senda afrit af prófskírteinum með umsókn. Vottorð eða sérstakar upplýsingar, t.d. um sértæka námsörðugleika, námsferil úr erlendum skólum og sértækum skólum, geta nemendur látið fylgja með umsókn sem viðhengi. Einnig má senda slík gögn til viðkomandi skóla með pósti eða biðja viðkomandi grunnskóla um að senda þau. Greiningargögn á ekki að senda með umsóknum.

Vegna grunnskólanáms erlendis

Ef nemandi hefur lokið grunnskólanámi erlendis eða stundað sambærilegt nám þar, er best að hafa samband beint við þann framhaldsskóla sem nemandi sækir um hjá. Nöfn þeirra sem sjá um innritun í hverjum framhaldsskóla má sjá á heimasíðum skólanna.

Afgreiðsla umsókna

Eftir að innritun lokar kl. 23:59, þann 10. júní, er ekki hægt að breyta umsókn.

Framhaldsskólar velja inn nemendur eftir fyrirfram mótuðum viðmiðum sem lögð eru til grundvallar við innritun. Hver og einn skóli raðar umsækjendum út frá þeim viðmiðum sem viðkomandi skóli hefur sett. Skólavist ræðst af vali umsækjenda og samþykki skóla.

Fái umsækjandi ekki skólavist í þeim skólum sem sótt var um sér Miðstöð menntunar og skólaþjónustu um að tryggja viðkomandi skólavist. Stefnt er að því að öll hafi fengið skólavist fyrir lok júní 2026.

Framhaldsskólinn sem samþykkir umsókn nemanda sendir greiðsluseðil fyrir innritunargjaldi á lögheimili eða í heimabanka forsjáraðila. Hver skóli gefur ákveðinn greiðslufrest og ef gjaldið er ekki greitt á réttum tíma er litið svo á að nemandi ætli ekki að þiggja skólavist á haustönn 2026. Skólinn getur þá boðið öðrum nemanda plássið í staðinn.

Skólameistari hvers framhaldsskóla ber ábyrgð á að afgreiðsla umsókna sé í samræmi við kröfur um undirbúning sem skólinn gerir, svo og verklagsreglur ráðuneytisins. Skólameistara ber að rökstyðja ákvörðun skóla ef umsækjandi óskar eftir því. Heimilt er að kæra synjun umsóknar til ráðuneytisins ef umsækjandi unir ekki skýringu skólameistara.

Vantar frekari aðstoð?

Þú getur sent okkur spurningar á innritun@mms.is og við svörum um hæl.

Með kærri kveðju,



Forstjóri Miðstöðvar menntunar og skólaþjónustu